



Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

Kejelcha-i world half-marathon record tasen ka yangluogo

Russia amaktsü teyari agütsüra
Moscow-i telangzüba agütsütsü: Putin



VOL. XXII ISSUE NO. 19 (ADOK 19) DIMAPUR TENTONÜ (MONDAY) MONGPUTENI (OCTOBER) 28, 2024 ₹ 5.00

WNYF-i Dimapur Police nem tenüngsang agütsür

Dimapur, October 27, 2024 (TYO): October 10, 2024 nü tashiyim agi sen meshiba aser nisung pur aoba ken o nung tongti süa tai tonglokja alir apuba atema Dimapur Police Commissioner nem tenüngsang mepishir ta WNYF-isa metedaktsü.

Ceasefire Supervisor Board (CFSB)-i tashi agütsüba den Nagaland Police-i bendanga agütsüba ajanga mapang shitak nung temeten nguogo ta WNYF-isa.

Kin lanur teloktem, shishilembar teloktem aser kijatemi temeten mangu tashi noktakba atema tenüngsang agütsür. Naga nunger lanurtem külemi longjemer noktakra, asen loktliba nungi mapa tamajung ajak agientetsü ta Media Cell, WNYF-i sangdong ka nung metedaktsü.

Bangdakpurtemi pua aliba nisung anema NSA kübok ken o benoktsü ayongzüker ta parnokisa ashi.

Ceasefire Monitoring Board/ Ceasefire Supervisory Board-i

Interim WNYF ya Dimapur nungi district asem lemsa maodang tentetba telok ka lir.

Kiralongraba anema raratsü: S Jaishankar



New Delhi, October 27, 2024 (Agencies): Kiralongrartem 26/11 Mumbai amakba mapang India-i telangzüba kecha magütsü ta saka tanübo iba amala atalokra meyiptsütsü ta External Affairs Minister S Jaishankar-isa.

"Mumbai nung atalokba ama tanaben matalokdaktsütsü. Kiralongrartem amak aser telangzüba kecha magütsü" ta EAM Jaishankar-isa.

"Mumbai ya India aser alima asoshi counter-terrorism maitsü ka lir" ta paisa ashi.


"UN Security Council nung India züngsem asüdang counter-terrorism committee nung menden ser senden ka amen. Kiralongrartem amakba hotel nung onoki counter-terrorism panel senden amen. India-i kiralongraba anema noktaker ta nisungtemi meteta lir. Tanü kiralongraba anema raraba nung asenok lennirtem lir" ta Jaishankar-isa.

"Asenoki kiralongraba anema zero tolerance indang jembidang, nisung kati langka inyakra, telangzüba agütsütsü ta jangjatsü. Asenoki iba mapa inyakertem temai adoka sayutsüla. Anüngdang mapa ka aser aonung kiralongraba inyakra India-i magizüksü. Asenoki kiralongraba yimjak nung metedaktsütsü aser teinyaktsü mapang inyaktsü" ta paisa ashi.

India aser China tsüngda tenangzüktep tongtipang ka agiba sülen anogo ishika lir Jaishankar-i tanü osangbener den jembi.

April 2020 nung arrtsü atema mangatetep madokdang aliba ama Ladakh nung Line of Actual Control (LAC) nung linük anaprongi patrolling tenzüksü. October 31, 2020 matongdang Demchok aser Depsang amala tesemtem nung patrolling inyakra ama tenzüksü" ta External Affairs Minister-isa.

Ozung nung 'Digital Arrests' indang lateta mali: PM Modi



New Delhi, October 27, 2024 (Agencies): Prime Minister Narendra Modi-i Deobarnü linük ozüng nung "digital arrest" inyakim lateta mali ta ashi.

"Digital arrest ya ashikülak aser miimshia inyakba mapa ka lir. Iba mapa nung shilem agirtemji amenokogo" ta PM Modi-isa ashi.

"Ashikülakertem tai maketba nisungtem ashioktsütsü atema parnok national investigation agencies nungi ta ashir. Digital arrest ashikülak mapa kübok

parnoki police, CBI, RBI mesüra narcotics kettangsürtem ta shia jembir. Mann Ki Baat nung nisungtemi iba atema asüngdanger" ta paisa ashi.

"Item nisungtemi tamasa nü indang personal information bendener. Tanabuba parnoki tetsübu aitdaktsür aser iba sülen rongshitsü tenzüker. Digital arrest ajanga akoksartem rongnung nisung tapu ajak dena lir. Nisung aika peii meranga aatetba sen lakh aika akoksaogo" ta PM Modi-isa metedaktsü.

"Nü dangi iba ama call arura, na tetsübu. Investigating agency kechaia phone mesüra video call ajanga asüngdangya masür. Digital security atema mera 3 lirstop, think, & take action. Kokra, nai screenshot agiang aser recording süang. Government agencies-i phone ajanga amokmeren masür mesüra sen memeshir" ta Modi-isa Deobarnü 'Mann Ki Baat' nung ashi.

Taoba minister & MLA tiben inyaker TA Ngullie asü

Kohima, October 27, 2024 (TYO): Taoba Minister aser Nagaland Legislative Assembly nung MLA tiben inyaker T A Ngullie tanü Dimapur nung aliba nungi pilaogo. Pa arishi küm 90 liasü.

Nagaland Legislative Assembly mezüngbuba nung tugububa tashi nung dang trokbuba nung dang mesüi TA Ngullie-i 37-Tyui Assembly Constituency nungi MLA ka ama inyaka aru.

Asür Ngullie-i 1982 nung Finance, Revenue and Electricity Minister aser 1989 nung Agriculture, Horticulture and

Irrigation Minister züngsema menden balala nung mapa inyaka aruogo. Paisa Deputy Speaker aser Leader of opposition inyakogo.

TA Ngullie ya Mungya nunger liasü aser Hombarnep 10:00 ako nung Chümoukedima nung par kidang sentong tatsüka agir pa mang Wokha-i bener aotsü aser idak nung jagi par tasoyimi bener oa aremtsü ta osang angazüker.

(Maneni tapak 2 nung...)

Mizoram nung ali kibur 2 nem kasa ali atema temenok agütsütsü

Aizawl, October 27, 2024 (Agencies): Linük nung tang mezüng atema Ministry of Road Transport and Highways (MoRTH)-i telok ana nem kasa kimung atema temenok agütsütsü.

Iba ya Mizoram nung Vairengte aser Sairang tsüngda four-lane highway atema lir ta Deobarnü ketdangsürtemi ashi.

Mizoram Chief Minister Lalduhoma aser Union Road Transport and Highways Minister Nitin Gadkari na taoba hopta senden ka amendang, mapang talangka atsütepa aruba ken o atema iba ya lemtet ta Mizoram sorkar ketdangsürtemi ashi.

Assam arrtsü anasa Vairengte aser Aizawl anasa Sairang tsüngda kilometer 132 talang four-lane highway ya Mizoram-i linük den sendaktepba tongtipang

lenmang ka lir. Iba double-lane highway ya Assam ajanga National Highway-306 den sendaktepba lir.

"Kasa ali atema ali kibur ana tsüngda mapang talangka tekong merangtepba aruogo. Iba ajanga

Vairengte aser Sairang sendaktepba four-lane highway mapa metenzükteti aru" ta ketdangsüri ashi.

Centre sorkari kasa ali atema ali kibur ana aser Mizoram Environment, Forests and Climate Change Department nem temenok agütsütsü mulungogo ta CM Lalduhoma-isa.

Forest Department-i Rs 90 crore aser ali kibur anati Rs 110 crore temenok angutsü, ta paisi ashi.

Ali kiburtem aser state Forest Department tsüngda kibur raktepba ajanga four-lane highway mapa metenzükteti aru.

"Idangji Union Minister Gadkari-i Forest Department nem Rs 90 crores aser kulikaket tejangja aliba ali kiburtem nem Rs 110 crores temenok agütsütsü nangzük" ta paisa shisem.

KVK Mokokchung ajanga training agütsü



Dimapur, Mongputeni/Oct. 27 (TYO): Krishivigyan Kendra Mokokchung ajanga Tsusangra Nemna Valley Farmers Society kubok aluyimer asoshi training cum farmers scientist interaction sentong ka October 26, 2024 nü Tuli Town Hall nung ayongzüka liasü.

Iba sentong nung aluyimer 40 dena liasü, kong technical session asoshi shisalen sayur ya Imtisenla (ACTO Agronomy),

Khekali Sema (ACTO Horticulture) aser Imtilemla (ACTO Soil Conservation) liasü.

Iba mapang tenemtsüng nung aluyimba nung 'short and medium duration rice varieties' amshiba, double cropping, soil nutrient management, soil testing, water management, aonsotsü lu ayimba tajangzük, mongpu nung adokba aonsotsü anepaluyim amala sayua liasü.

Parnoki kasa mapang sensaksema agia liasü, kong aluyimer temi mesen, tashidak balala aser ali temu ketdangsüba nung timtem ajuruba indang asüngdanga liasü aser mongin temi telangzüba agütsü.

Sentong tembanga mongpu nung amshiba aonsotsü metsüjangnatsü, waste decomposer aser biofertilizers amala agüja liasü.

Asür T.A. Ngullie asükhu lemsateper tejangja

Dimapur, Mongputeni/Oct. 27 (TYO): Yimten yimsüsür tejen aser Nagaland nung taoba mapang minister inyaka alisang T.A. Ngullie, October 27, 2024 nü Chümoukedima nung süogo. Asür Ngullie ya Mungya yimtsüng nungi lir aser Wokha District kubok 37 Tyui A/C nungi Nagaland Legislative Assembly nung elected member ka ama taoba mapang inyaka liasü.

Pa asüba osang angashia Nagaland Chief Minister Neiphiu Rio-i sangdong ka nung asükhu lemsatepa liasü.

Rio-i sangdong nung ashiba agi, pa 1989 küm Nagaland Legislative Assembly nung züngsem ka ama mezüng shimdang Asür Ngullie denkülemi inyak.

Pa dak yimya tajung aliba ni bileyemteter, shibai nisung ajak sako meima amshi. Pa dak nükla tajung liasü aser yimsü asütsü tejangraba tulu liasü, shiba mezüngbuba Nagaland Legislative Assembly nung züngsemtem rongnung ka liasü, ta CM Rio-i ashi.

Pai teti nüburtem yaritsü

mulunga liasü aser ajak den sako liasü. Nagaland aser nüburtem tejakleni aotsü asoshi pai shilem tajung agiba nisung ajaki teti bileyemtetsü.

Pa asüba ajanga Naga nunger aser talisa Lotha nunger asoshi lenmang sayur ka samaogo. Pa asenok nungi pilaba ajanga asen mulung shiranger, saka pai mapa tajung inyaka yutsüba asen mulungjang nung teti alitsü aser Tsüngrem nem tenüngsang agütsür. Tang mangyimba mapang Government of Nagaland tenüng nung mangyimer kibong den asükhu lemsateper. Tulusang tsüngremi nenok ajak nem temulung nung anisüngzük aser tasü tait mulungsentsü agüjang ta sarasademsür. Asür tanüla teti tatem maka tesunep nung anisüngzükjangma, ta CM Neiphiu Rio-i ashi.

Advisor, Information & Public Relations, Soil & Water Conservation, Imkong L. Imchenia sangdong ka nung T.A. Ngullie asüba asükhu lemsatepa liasü.

Asür T.A. Ngullie ya Naga nunger lenir tejangja, ajemaluba nübur tenzüker aser par mapang

Iemsateper tejangja nübu ka liasü.

Pa Nagaland Legislative Assembly nung tenet ben tashi züngsem ama inyak aser iba mapang pai Cabinet Minister aiben inyaka liasü. Naga nunger ajungai pa akumtsüboa aru, shibai nübur ajungtsü asoshi bendanga agütsür inyak, ta Advisor Imkong-ia shi.

Nagaland Pradesh Congress Committee sangdong ka nung T.A. Ngullie asükhu lemsatepa liasü.

Asür Ngullie ya Congress MLA ama Finance Minister inyaka liasü, ta ashi.

Ex-Parliamentarians Association of Nagaland (Ex-PAN) indang sangdong ka nunga par züngsem T.A. Ngullie asükhu lemsatepa liasü.

Pa ama züngsem tejen aser shisa taka lenir asüba ya Ex-PAN asoshi takoksa tulu lir, ta ashi.

NLA küm 60 ajungba benjongmung amungtsü lia pa asüba ya tejashitsü ulura aser NLA mezüng House nungi züngsem ka tanübo iba lima nungi pilaogo, ta Ex-PAN ajanga ashi.

Raj Bhavan nung Mann Ki Baat screening ayongzük Dimapur, Mongputeni/Oct.

27 (TYO): India indang Ato Kilonser Narendra Modi-i ita shia ayongzükba radio sentong Maan Ki Baat sayuba sentong October 27, 2024 nü Raj Bhavan, Kohima nung ayongzüka liasü.

Iba sentong agiba mapang Nagaland Angh La Ganesan-i Shalom Rehabilitation Centre, Chümoukedima nem tenüngsang agüja liasü, shirnoki Nagaland aser North East nung aliba nübur asoshi tatishitsü tajung aketba mapa inyaka liasü.

Temesepba mozü achi-ajemba ajanga kija, kibong aser lokti nung temi tayongzükba balala ajangshiba nung yariteptsü atema Shalom Rehabilitation Centre ya Diocese of Kohima (Catholic Church) ajanga 1993 küm amenok.

"Together We Can" omen kubok iba centre yagi zünger mezüngmai nisung takum aika melenshitsuogo. Medical Mission Sisters (MMS) aser Medical Sisters of St. Joseph (MSJ) den lungjemer Shalom yagi chemical dak metaloka aliba ajanga kongshir takum asendenshidakstsü asoshi inyaker.

Shalom Rehabilitation Centre nungya ita pezü residential program agütsür, kong pharmacological aser non-pharmacological treatments lir, Iba den külemi Apongba Ozukum-ia Shalom nung ajangshiba lemsatep aser Under Secretary to the Governor, Kevingozo Visa ajanga metettela mapang agia liasü.

Blossom PreSchool Mokokchung küm 10 abensaba nüngtem nung sentong agi



Blossom PreSchool küm 10 ajungba nüngtem nung sentong akadang Administrator Wt. Sashinungla-i jembir aser tanurtemi shilem agiba mapang tangokba noksa.

Mokokchung, October/Mongputeni 27 (TYO) : Blossom PreSchool lapoker küm 10 abensaba nüngtem nung sentong tanü Aongzü ki Mokokchung nung kanga dang takok ngua longso longsoa agiogo.

Blossom PreSchool ya Mokokchung nung tila tanur school-i ao metenzükhang jilia anepalua parnok dang tesayuba balala agüja aniteter aser Mokokchung nung Pre School tajungtiba rongnung ka asütsü. Tanu iba PreSchool küm 10 ajungba nüngtem nung sentong agidang Blossom PreSchool tenzüker zünga arurtem parnok tsüraburtem, tang tezungdak tanurtem aser par tsüraburtem ajak adenshia iba sentong kanga dang meraketa agiogo.

Blossom PreSchool Administrator Wt. Sashinungla-i jembidang küm 10 tashi school jaja arudang Tsüngrem taochi agi takok tuluma nung aser nisung aika temesepba mozü achi-ajemba nungi tanepetsü anguba nung yaria lokti nung tanaben lirumedema literet. Shalom yagi temesepba mozü achi-ajemba nungi tanepetsü aginer nem teyari tajung agütsür. Rev. Fr. Dr. Joe Mariadhas-i anir iba centre nung bendanga agütsür inyakba team ka lir, aser parnoki nisung ajak kanga junga anepalur. Par nükjidong ya temelensi adokdakstsü, temeim ajanga teimla tasen agütsü, tebendang makai anepalutsü aser tarutsü jenjang tajungba kumdakstsü asoshi yaritsü lir. 'Maan Ki Baat' screening shia Nagaland Ang La Ganesan-i nübur tenzükba kija aser lokti tushia amshir. Iba ama mapa inyakba yagi tatishitsu tajung tali jangjatsüba kisüng masü saka nüburtem dang Nagaland aser bendang lima nung nübur takum tajungba kumdakstsü asoshi mapa tajung inyaktsü ajungmesor.

Kohima nung Battle of the Bands indang Season-6 liogo



G. Rio School, Kohima nung Honibarnü Battle of the Bands indang Season-6 aliba nung takok anguba telok G. Rio School, Kohima nungi 'After Life' band noksa nung angur.

Kohima, Mongputeni/Oct. 27 (TYO): Honibarnü G. Rio School, Kohima nung 'Battle of the Bands' (Inter-School Music Fest 2024) indang Season-6 ayongzüka liasü.

Iba sentong nung kentener telok trok-i toktepa liasü, kong G. Rio School nungi 'After Life' kentener teloki mezüngbuba jenjang ngutet.

Vineyard School nungi 'Midnight Riot' band aser Rev.

Dr. Neiliezhü Usou Memorial School nungi 'The Acoustics' band ajanga tanabuba aser tasembuba jenjang ngutet.

Kija telemsa nung Vineyard School nungi awards ana, lead guitarist aser drummer nati angu.

Rev. Dr. Neiliezhü Usou Memorial School ajanga Best Singer sempet angu, G. Rio School nungi Best Bassist aser Mezhur Higher Secondary School nungi Best keyboardist

sempet ngua liasü.

Iba sentong nung tongti tesemdanger ama Alemtamshi Jamir, IAS (Retd. Chief Secretary of Nagaland) dena liasü.

Battle of the Bands Season-6 nung tetendanger tem ya Mhaseve Tetseo, Temsu Clover aser Aaron Adarsh liasü.

Iba sentong ya G. Rio School aser Zhaleo Rio (Retd. IAS) den Neingutuo Rio nungeri sponsor süa liasü.

Tsüngremi len ania aruogo, iba denji külemi tsüraburtemi nungitba ajanga tanurtem 650 tashi aniteta aruogota metedakstsü.

Laisa Blossom PreSchool lapoker küm 10 ajungba nüngtem nung Blossom PreSchool Student of the Decade sempet Sb. Moachang nem agütsü, ano Student of the year-2024 sempet Sb. Lensar Molo Jamir nem agütsü.

Iba sentong nung tanurtemi shilem balala agiba den Blossom PreSchool küm 10 ajungba nüngtem nung Administor aser Student of the year-2024 Sb. Lensar Molo Jamir tenati cake alem, Blossom PreSchool lapoker mezüng azüngertemi School Anthem aten aser Tsüngrem nem tenüngsang agüja Asso. Pastor MTBA Wb. Monglier ajanga sarasadema sentong tembangba den Rohit ketedangsüba nung iba sentong agia liasü.



October 27, 2024 nü New Delhi nung BJP National Tir, JP Nadda den party nung inyakertemi Ato kilonser Narendra Modi indang 'Mann Ki Baat' sentong reprangdang tangokba noksa nung angur.

October 29 nü teintet sensotem atema AB-PMJAY scheme tenzüksü

New Delhi, October 27

(Agencies): October 29, 2024 nü Ato kilonser, Narendra Modi-i arrshi küm 70 ser temapur teintet sensotem atema Ayushman Bharat Pradhan Mantri Jan Arogya Yojana (AB-PMJAY) scheme tenzüksü, ta kettangsertem osang ka ajanga metedaktsü.

Sensaker süaka, middle class süaka upper middle class süaka mesura takartem süaka arrshi küm 70 ser temapurtem ajak Ayushman card angutsü atema temsüa lir aser kodang iba scheme tenzükdir AB PMJAY empanel hospital tem nung parnoki sen lakh 5 tashi jenjang angati treatment agitetsü.

September 1, 2024 anogo tashi nung nije hospital 12,967 densema hospital 29,648 iba scheme kubok empanelled süogo.

Iba scheme ya Delhi, Odisha aser West Bengal dak alaka states aser Union kubok arrshi küm 70 aser territories 33 nungbo benoka

temapurtem atema iba scheme inyakdar.

Aadhar card nung arrshi crore 4.5 nung teintet senso crore 6 tajangzük angutsü," ta kasa osang ajanga metedaktsü.

"Ayushman card alirtemi card tasen atema tenüng agütsüla aser eKYC tanaben renemtsüla," ta kasa osang ajanga metedaktsü.

Iba scheme atema PMJAY portal mesura Ayushman app nung register asütsüla.

Central Government Health Scheme (CGHS), Ex-Servicemen Contributory Health Scheme (ECHS) aser Ayushman Central Armed Police Force (CAPF) alirtemi tang aliba scheme shimsüa akok mesura AB PM-JAY scheme tasenba shimsüa akok.

Tang alima nung chiyungtsü agi tamajungba anüngba linük 10 ji Somalia, Yemen, Chad, Madagascar, Democratic Republic of Congo, Haiti, Niger, Liberia, Central African Republic aser North Korea linüktem lir.

"Ato kilonseri Ayushman Bharat health insurance scheme nung jenjang 70 aser territories 33 nungbo benoka

Bendanger nokdangba ajanga dang Bengal nung tesünep alitsü: Amit Shah

Petrapole, October 27

(Agencies): Amongnū Union Home Minister, Amit Shah-i, Bangladesh nungi bendangertem ozüng alema India telungi aitba ajanga India nung tesünep raksatsür; artsü adena bendangertem aitba nokdangba ajanga dang Bengal nung teti atema tesünep alitsü, ta metedaktsü.

West Bengal nung India-Bangladesh arrtsülen Petrapole nung passenger terminal building tasen semzüksüba sentong nung jembidang Amit Shah-i, 2026 küm West Bengal

assembly election nung BJP-i takok ngua sorkar aküm nung ang Bangladesh nungi ozüng alema arur bendangertem nokdangtetsü, ta metedaktsü.

"Artsü adena aitstsü atema kodang inyakim melidir ibaji ajanga ozüng alema bendangertem aiter. Ozüng alema bendangertem aitba ajanga India-Bangladesh tsüngda tesünep raksatsür. Ni Bengali nungertem dang ya shiner- 2026 küm sorkar melenang, yamaji sulla onoki bendangertem aitba nokdangtsü. Bendangertem

nokdang nung ang tesünep alitsü," ta Union Home Minister-isa metedaktsü.

Petrapole land port nung terminal building ji sen crore 500 indoka 60,000 square meters nung yanglu aser anogo shia iba nungji passenger 25,000 asemtsü.

"Land ports amenokba ajanga linük ana tsüngda connectivity aser tesendaktep tajungba akumba nung tongtibang shilemagir. Ibaji ajanga linük ana tsüngda shishilembaba jenjang a jungdaktsü," ta paisa metedaktsü.

Bendangertem



October 27, 2024 nü Patna nung RJD party nung tasenpurtem agizükba sentong nung RJD tongti, Lalu Prasad Yadav, Bihar Assembly nung Opposition lenir, Tejashwi Yadav, taoba mapang MP Mohammad Shahabuddin kinüngtsü Hina Sahab aser lar jabaso Osama Sahab nunger tangokba noksa nung angur.

2024 Global Hunger Index nung India 'Serious' category nung lir

New Delhi, October 27

(Agencies): Alima nung mamatzü teimba adokdaktsüba India linük aser mochi, jang aser wheat teimba adokdaktsüba linüktem rongnung tanabuba jenjang nung aliba India linük ya 2024 Global Hunger Index nungbo 'Serious' category nung lir.

India nung chiyungtsü jenti züsentetyonga linük nung sensotem chiyungtsü tajung agi matur.

2024 Global Hunger Index nung linük 127 nungi India jenjang 105buba nung ang lir.

Alima nung rongsenkettzung tekeratiba aliba linüktem rongnung India lir, ajisüaka nütsüng billion 1.45 aliba linük nung sensotem chiyungtsü agi anüngba ya tebilemtsü onük tuluka lir, ta mongintemi metedaktsüogo.

Iba Index nung serious category nung India, Pakistan aser Afghanistan densema linük 42 lir. India kidanger linüktem Bangladesh, Nepal aser Sri Lanka bo 'moderate' category nung lir.

India nung nütsüng aika chiyungtsü agi anüngba ya kuli balala ajanga lir, aser item rongnung- kanga sensak tia

nung aliba agi nisung aika yaseta asuba, iba denji külemi chiyungtsü jenjang kanga asakba aser region balala terenlok tsütsü liromemedemba ajanga lir.

India nung atsüapong, kin aser arrshi küm ajanga-a chiyungtsü tajung achiba lenla nung kongshir. Tatishitsü agi, tetsür tanur ka mesura kanga tantsür-tamburtem aika nüngdakba chiyungtsü agi meperir.

Ano kulen kuli kaji, chiyungtsü agi anüngba mesura chiyungtsü tajung agi matuba tebilemtsütem koktetsü atema inyakim tajung mali. Iba dak alia climate change ajanga-a India nung chiyungtsü agi anünger. Tzüngluruwa mongpu nung tzünglu shidak maruba, aluyimba mongpu melenshiba, alu nungi züsentetba aser tzümpung dak sendakba lendong balala ajanga alu nungi peria mezüsenteter.

Tang alima nung chiyungtsü agi tamajungba anüngba linük 10 ji Somalia, Yemen, Chad, Madagascar, Democratic Republic of Congo, Haiti, Niger, Liberia, Central African Republic aser North Korea linüktem lir.

Kobi melii LAC nung patrolling tenzüksü: S Jaishankar



October 27, 2024 nü Mumbai nung aliba BJP office nung External Affairs Minister, S Jaishankar-i osangbenertem den jembidang tangokba noksa nung angur.

Mumbai, October 27

(Agencies): Amongnū External Affairs Minister, S Jaishankar-i, kobi melii India aser China nati Ladakh kubok Line of Actual Control (LAC) nung patrolling tenzüksü; 2020 küm April ita nung aliba ama patrolling tanaben tenzüksü, ta metedaktsü.

Mumbai nung aliba BJP office nung osangbenertem senden ka nung jembidang Jaishankar-i, "October 31, 2020 jakdang aliba ama Demchok aser Depsang nung patrolling tenzüksü. Iba atemaji mapang tatsüka agitsü," ta metedaktsü.

Jaishankar-i, October 21, 2024 nü India aser China na tsüngda tezungzüktep agiba sülen linük anaprongla nungi sepaitem anüdoklen Ladakh kubok Demchok aser Depsang Plains nungi aienshi tenzükogo, aser October 28-29 tashi nungbo iba maparen tembangtsü.

talisa Zabsang aser Demchok nung item tenokdangba agienogo, ta metedaktsü.

Arrtsülen tesünep alitsü aser tensa azüoktsü nükjidong nung linük anati iba tezungzüktep agi, kechiyong item tesem nung linük anaprong nungi sepaitem aika adenhsia liasü.

India aser China na tsüngda tezungzüktep agiba sülen linük anaprongla nungi sepaitem anüdoklen Ladakh kubok Demchok aser Depsang Plains nungi aienshi tenzükogo, aser October 28-29 tashi nungbo iba maparen tembangtsü.

Mangatettep aliba point ana atema dang tezungzüktep agi, aser maneni tanüngba tesemtem nunga tezungzüktep agitsü atema tang tejembidak, ta Jaishankar-isa metedaktsü.



TIR YIMYIM

YIMOBILEM (EDITORIAL)

DIMAPUR TENTONÜ, OCTOBER (MONGPUTENI) 28, 2024

Asenoki len tajung ka sayutsüla

Asenoki repranga lia Naga yimten nüchiso bushir telok teimba -teimba kuma aoba angur aser Naga yimten bushir telok ka mesüra kati Naga nunger mapa inyakertem dang saru meshiba tsütsü mapang mapang shia timtem adoka pua bener aoba aser amokmerentepba angur aser angashir. Aji oda, iba putu tasenba kisüng nunga Naga yimten nüchiso bushitsü atema telok ter dak tali tentetogo aser asenoki tang Naga yimten tebilemtsü madak ya takok ngua telemtetba tajung kati marutetra ano Naga yimten nüchiso bushir telok teimba-teimba tentetyonga aotsü ana nung lir. Ashiko, asenok aikati asenok akoksaba memeteti Naga nungeremji telok kwika tentetner tentetyonga oang ta zübazüba ashitsü akok, ajisüaka Naga nunger asoshi yimten nüchiso bushir telok paikaji shisabai mesütsü (?) ta asüba tebilemtsü adoker. Atangji, parnokji Naga yimten nüchiso bushirtem, ajisüaka telok paika tebok sünga mesür külenang linük asoshi nüngdak inyaktsusa Naga nunger shibaibo saru agütsütetsü ? Item linük tenzüker teloktem jagia koba nungi kechi bener arua parnok telokji taküm litettsü ? Itemji kodang bilemdangdir, mesaruli asüyonga government mapa inyakertem aser business inyakertem dang nungi parnoki tashiym agi saru sarutsür. Ibayongji, tanü government mapa nung inyaker aser business inyakertem dang telok zünger mezüngmai ita sen aser mapa inyakba nungi shilem tilala meshiba angashir. Aji oda, hai ta ser Naga nunger linük tenzüker telok shia nem peii aaba sen nungi linük asoshi 1% agütsü nunga, tang tenteta akaba telok ajak nem agütsüdangbo noklang nung shilem kaka, kaka agütsüba agi 20% dak tali adoktsü. Kodang aji bilemdangdir, idakji timtem lendong keta lir. Shishilembadaka, whosale ayokertem dang nungi alo aser feas seret nung senpak kaka dang sarua agi nunga, telok 20 agi agidangbo senpak 20 adoktsü, anungji asenok talirtemi alo aser feas seret nung sen talila 20 temloker alitsü. Iba kasaji jangotsü aser kisüjensüba oset ajak nung asenoki meteta aser memeteti sen aika temloker agütsüdag. Aji oda, asenok dangi kibong shia saru saruyongabo marutsüa akok saka anogo shia asenoki chia ajemba metsü nungi shir tzü tashi nung asenoki linük tenzüker telok ajak nem saru agütsüdar ta billemdi. Iba tashijia kecha masü asenoki aremtettsüa akok saka yamai sarua sarua saru agi telok nüngdak meperitsü aser Naga yimten nüchiso bushir teloktem rongnung tashi tokteptsü, idangji akhi ama parnok rongnung injang amshitsusa akümtsü. Aji dang masü, saru magütsürtem dang tamajung inyak tenzüksü, idangji nübor temi parnok anema apusotsü ta tanen maka Naga yimten nüchiso asoshi India den masü saka Naga nungerem rongnung rara adoktsü. Idangji, Nagaland nung terenlok mapa ajak anenadoktsü aser Nagaland agi anak auyi akümtsü. Ibaj iatalokdaktsütsü atema asen Ao kini Naga nungerem dang len tajung ka sayutettsüa Tsüngrem dang shisatsü meshia inyaktsüba mapangji tang ya lir. Naga nunger lenitsü atema masü saka len sayua khuret abentsü atema Ao kin shimteta lir ta maparen aika nungi angateter. Tanü tashi Naga nungeremtai hai haura kaa anidaktetba mapa aser sentong ajakji Aotsür Aoertemi len sayuba mapatem lir. Aji oda, Khristan yimsüa Ao kini tama agizuka lemsatepba agi Naga nunger ajak Khristan kümogo. Tanü tashi Naga yimten tatembang kati marutet timtem liaka, Nagaland state-a Ao kin nungi adokba lenir tajungtemi taküm bendanga agüja inyakyong tang küm 60 ajungba benjongmung amonger. Kasaji, Naga nunger tetsübu agi kimaia malutet aliba mapang Ao kin nungi adokba wabong tajungi anir FNR teloki Naga nunger rongnung yimjung bener arutsüogo. Aji oda, 1946 küm Naga yimten nüchiso jenjang ka latettsü atema tentetba Naga National Council (NNC) küm tetba mapanga Ao kin nungi Wabong T. Aliba Imti tir shimtet aser parnoki 1947 küm 14 August nung Naga yimten nüchiso anguba osang alima dang sangdong. Tanü iba osang jagi mapa mekümet Naga nunger timtem nung lir. Iba amai Naga nunger len mangu timtema alidang, anosa Ao kin nungi yimsüsür aser lenirtem kenbang obang ka ser Naga nunger nem shisalen sayua Naga yimten jenjang ka latettsü merangtsüla. Tanü Naga nunger yimten aser lokti nung Ao kin nungi tongti menden nungbo shinga mena malitsüa akok, ajisüaka lenisüba aser lenirji mendenji masü saka shibai len sayuteter, pajii mesüra laji dang shitakba nungbo lenir lir.

OLEMSABANG

TEMESHI SAPANG NUNG SADIBAJI ATAKATEM ASÜ TEMOATSÜ

- Mrs. R. Mapukala Pongan, Rtd.Teacher,
Merangmen,Tzürangkong.

Meimchir ajak asoshi tongtibang mapang asem lir.

Tasoba, Kiyir benjong, aser tasüba anogo.

Ajak rongnung temeshi kiyimba, ibai Eden nungi tenzük.

Jangratemtsüka ! Temoatsü kibong ka tenzükba anogo.

Tepenjem mapang,tatidang ajak kokteter, kodaker sangwa nung.

Kibong tasen ka yangertsü temerük molung bener aya-okba anogo.

Aki putu kibalembuba shilua reprangdangra,

Ani asüngba yimyaji onsara temerük liasü.

Pa mesüra la kichi kidong ta jangjatep.

Tetzü ,tebou taruba azü tajung asü masü ta pushi.

Ashi auer, külakkubanger denbo melenbu.

Iyongji lia aodang lembu azüka sobet sora mali lia aru.

Ani asünger ita tataket Arogoi repranga ata.

Tebur arijo,tetzürtem tsüki nung mejanga asüngteta ali.

Kiyimba nung aibelenra atakatem ta pari angatet.

Aben lagi kibong temoatsü nung taso shia lia aru.

Pei-i molungjangi pei-i maitsüi azükarua liasü.

Ibai asen sobaliba meraküt, aser tsüngchi inyakyim.

Tanü tasen putu, tanela temeshi putu ta jembir.

Tsüngküm mapang atonger-Wedding! Wedding! Wedding!...

Nübor tem pelateper, Arogo züngsem tajung ka renloker.

Kiyimba kulizüng kaket Arogoi sarasadema sempeter.

Ali mesama tashi iba kaket ner kidang itaka ayur.

Saka na! Ibaj i temoatsü asü atakatem, shisadangang no...

Asüngteta lir temeshi sabang nung nokdak asü,

Nüktapangta temenen nembinga yur temeshi yimya sayu.

Meshidaki lira nai sadiba anogo mepilemtetnüsü.

Kichiba atakatem bener kibong taseni aya-oktsüaka!

Alimali junger ta shiaka, Tsüngremi majunga ta shira koda.

Odia ni aibelenogo ta nangzükba nungang temoatsü süla na!

Aki putubo kin kidong memelensi-Tanübo nüngakra melenshir.

Aki putubo Arogo ozüng shidak anga-Tanü tendaka koda!

Aki putubo Arogo tenzükeri ochi kuli agütsü-tanübo ochi to kong ali!

Tanü putubo küm aika küleme lila arur-a sadü agütsür.

Takar,Tulur chir süra...tai ta metetsümongaka-kichia masü.

Teraksatet Yimden,Arogo-ya shibai yanglushitsü!

Oh...Angang! "Nagaland for Christ" Ochi jembir mali na!

Arogoi-a yazü jembir na ! Tanak, temesüng bendangang.

Kiyimba ya rongsen pushiba mapa ka masü.

Hai! Naga nunger ! Sadiba anogo nung aruba sen nungi ter shilem,

Tsüngrem tsüngdang tagizüktettsü tenla südi ma!

Akümlü nung lia aodang temoatsü asü atakatem, nai tendangtettssü.

**Iba Olemsabang nung lemsaba ken-o aser shisatsü ya iba ocet züleri
bilemba ken-o ama tazüngeri angateta agitsü mepishir**

Uganda nung pastor den par kibong züngsem ajak rongseta südaktsü



October 13, 2024 nü Uganda kübok Namutumba District nung Pastor Mukisa aser par kibong rongseta asuba tesem nung nisung aika adenshia aliba noksa nung angur.

Nairobi, Mongputeni/ October 27 (Agencies): Anüdoklen Uganda nung pastor kati Muslim nunger asem Khristan yimsü dangi meyipdaktsüba sülen Muslim nunger temi pastor kibong ajak mi agi rongseta südaktsüogo.

October 13, 2024 anepdang züngia 3:00 ako meta arrshi küm 30 pastor, Weere Mukisa, pa kinüngtsü Annet Namugaya (26) aser jala ana Judith Banirye (7) aser Sylvia Bamukisa (4) nunger kidang amoi oa lia Muslim nunger temi kidangji mi senokja parnok ajak rongseta südaktsü, ta Arogo nung lenir aser pastor adianu, James Tusubira-i metedaktsü.

Namutumba District kübok Kibale yimdak iba ya atalok.

September ita nung pastor Mukisa-i Muslim nunger asem Khristan yimsü dangi meyipdakja liasü.

"Muslim nunger lanur asemi Khrista agizükba sülen nungi

ozü adianu amokmerena liasü aser lanur Khristan asem denji tongtepratep tesü, ta tuyua liasü. Islam yimsü ajanga mamangertem yimsü magizüktsü sayur," ta Tusubira-i ashi.

Tusubira-i, "Anepdang züngia 2:48 ako meta pastor kidang nungi mi adoka anguba sülen onok iba tesem jagi ao, ajisüaka iba mapang tashi nungjibo tasümag pongu rongseter liasü. Anepdang sangwa tashi nung nisung aika adenshi aser kimaji petrol pongdang tazüng kar angu," ta ashi.

Kidang mi senoktsürtemji kidanger yim nungi liasü aser pastor-i iba yimdak alirtemji meteta liasü, ta Tusubira-isa metedaktsü.

Iba tatalokba osangji Kibale nung police nem metedaktsüba sülen police-i aibelenertem bushi tenzükogo, ta Tusubira-i ashi.

"Isam yimsü alia amangertem aser ozü adianu kibong ajak samatsürtem ozüng matsüngdangi anir arutsü atema sarasademjang," ta Tusubira-i ashi.

Ano külen Bugiri District kübok Nankoma nunga Muslim nunger tebur kati pa kinüngtsü Khristan yimsü agizükba sülen la dak acid shiloktsü.

Arrshi küm 27, Hidaaya Nabafa ji tang hospital nung mongdar.

Taküm August ita nung Nabafa-i Nankoma yimdak Tenla kidang Khrista agizüka liasü, ajisüaka lai ibaji kinüngbu dang mimshia aru.

La kinüngbu Kampala nung aliba mapang nung October 9 nü la Tenla kidangi ao, saka ka nikongdang kidangi arudang la kinüngbu kidang liasü. Tesülen la kinüngbu lai Khristan yimsü agizükba meteba sülen la dak azük aser acid shiloktsü.

Tanur million kati yimzung atema sarasadembä nung shilem agi

October 27, 2024: Taküm agi küm anabuba tanur million kati Khristan charity sarasadem campaign ka nung shilem agia alima nung yimzung atema sarasademogo.

Pope Francis-i ayongzükba nung ajemdaker iba sarasadem campaign nung tanur million 1 dak temai shilem agiogo.

Linük 150 nungi tanur 1,135,945-i Aid to the Church in Need (ACN) indang 'One Million Children Praying the Rosary' nungji shilem agitsü atema tenüng agütsüba sülen October 18 nü parnoki alima nung rara aliba tesem balala nung yimzung aser telongjem alitsü atema sarasadem.

Iba sentong nung shilem agir teimitbaji Nigeria (tanur 200,209) nungi liasü. Philippines nungia tanur 162,684, Poland nungi tanur 151,365 aser Brazil nungi tanur 75,579-i shilem agi.

'One Million Children Praying the Rosary' campaign ya mezung 2005 küm Caracas, Venezuela nung ayongzüka agia liasü.

Cardinal Marto-i, "Yangi asenoki taneli raraba hadir amer yimzung atema sarasademer, aser ibaji ajanga yiruba zübo aliba lima ka dang Tsüngremi taochi sayutsü," ta ashi.

Tanurtemi Ukraine, Israel, Myanmar, Mozambique, Sudan aser Democratic Republic of Congo densema tang rara aliba tesem balala nung yimzung alitsü atema sarasademtsü.

Bangladesh aser India ama Khristan nütsüng kanga ajema

ajemdaker iba sentong agir, aser taküm küm atema omenji 'alima nung yimzung alitsü aser rara anentsü' liasü.

ACN campaign ajanga ajungmesoa Chapel of the Apparitions, Fatima nung Cardinal António Marto leniba nung tanurtemi sarasadem.

Cardinal-i, 'Rara ajanga takoksa balala anguba timtemji tanurtemi meteta lir' ta ashi.

"Tanü item tanurtem ya alima nung timtem ajangshirtem dang temeim osang prokertem lir. Tsüngremi sayatenya mapatulu inyaktettsü," ta pai ashi.

Cardinal Marto-i, "Yangi asenoki taneli raraba hadir amer yimzung atema sarasademer, aser ibaji ajanga yiruba zübo aliba lima ka dang Tsüngremi taochi sayutsü," ta ashi.

Insight Church nung Pastor James Ward Jr. leniba nung iba sentong agi.

Arogo longjemtsü aser linük tanepstsü angutsü nükjidong yur pai inyaker, ta pai metedaktsü.

"America nunger tarutsü tia lendong nung lir. Tamangertem aser sensotem ama asenoki asen chirnur aser semchirtem atema bilemja inyaktsüla. Tang iba ama tensa ka nung Tsüngremi nüburtem longjemer asen linük wazüka ayutsü

ANOGO ABEN TSÜNGREM DEN

Lapok, Tashi Anga, Agi

- T.Ken 119:25-32

Temang tsütsü temulungjang ulubaji lendong lir. Saka tanelaren temulung ulubaji temoatsü ka lir. "Kodang nai kü mulungjang uludaktsüdir, ni ne temelaba lemangi asemtsü" (t.32). Na temang nung temulungjang waka lira, nai talangka asema moutettsü, saka na tanelaren temulung ulura, nai Kibuba den jajatsü aser asemtsü renema alitsü aser Kibuba nükjidong atalokdaktsütsü. Tasemteperi pa alizüng atongtsü asoshi pa lemang shitak nung asemer aser iba lagi pa nem maneni asemtsü tashi agütsür. Tanü ibaji Tsüngremi asenok nungi aginer. Asenoki atongtsü asoshi Pa nükjitong ka lir aser anidaktsü asoshi lemang ka lir. Aser Pa O ajanga asenok nem tashi agütsür.

Temulung uluba tetezü kechi? Mezüngbuba, temulung ulubaji Tsüngrem nem temulungjang lapoktsüba lir. Ibai ochi temulungjang aser ashir, "Kibuba, ne O agi ni yirujaka ni ibai aginer."

Tanabuba, temulung tului Tsüngremi mulungba nung tashi angar. Ibai ajemaluba temulungjang lir aser iba temulungjang yagi ashir, "O Tsüngrem, nai kechi shidir ni inyaktsü. Ni ne kilir. Na kü tesayur."

Tasembuba, temulung tului Tsüngrem sentsüwangshi agi sünga lir. Ibai tepela mulungjang lir. Kar temulung tila aser temesü lir. Parnok alima tila nung alir aser parnok tangatetba tila lir. Tsüngrem taochi metetba aser ochi temetetba nung anitsüba koda tesüngmangtsü mapa lir (2Peter 3:18)! Asenok litsü ulushir. Tamalen mengui aliba tang asenoki angur, kechi mangashi liasü tang angashir. Tsüngrem asenok nem taküm tulu agütsür kechiaser asenok temulung tulu kar.

Tsüngremer ochiba dangi ne mulung lapokjang aser Pai mulungba nung tashi angang. Tashi angaba mera shia ne temoatsü alitsü aser tenzükba ulushitsütsü. Item ajak rongnung tongtipangtibaji Tsüngremer sentsüwangshi agi sünga alibaji lir.

Museum of the Bible-i 7buba National Prayer Altar sentong ayonga agi

October 27, 2024: October 24, 2024 nü Washington D.C nung Museum of the Bible-i National Prayer Altar sentong ayongzüka agiogo.

atema sarasademtsüla. Temen madak takok angutsü aser America nungertem Tsüngrem dangi meyiptsü atema taoba mapang dang nungi tang taliba bendaga agüja sarasademtsüla," ta pastor Ward-i ashi.

Ward-i, National Prayer Altar mangdang ya sarasademtsü atema dang masü saka longjemtsü atema lir, ta metedaktsü.

"Tang mapang ya ajak longjemtsü atema Tsüngremi asenok ajar. Peipei sasep nung sarasadembä dang masü saka Tsüngrem nüburtem longjemer Kibuba matsüngdang apudaker sarasademtsüla. National Prayer Altar tongti nükjidongji ibaji lir," ta pai ashi.


"Tsüngremi meimchirtem politics ajanga meinyaker. Yimtenren party tem atema sarasademtsütsü asoshi Yisui asenok mayongzüker saka Pa yimli bushidaktsüner," ta pai metedakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tapokba**

(n) poksaa aotsüba oset, tapoktsü (bomb)
 * Lenmang yanglurtemi tapokba oset agi long poktoker.

Tapu

(v) kaket nung shilem kaka (chapter)
 * Onok tazüngtsü kaket nung tapu ter lir.

OLONG PAITEP # 6964**TIPLÉN**

2. Teburtemi tejak nung awaba- (8)
 6. T ___ em - (3)
 8. Tzük ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzü angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtaklir aikati iba ya ki den
 külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaktsü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsüngda - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanüdangtsü - (4)

OLONG PAITEP # 6963 TELANGZÜBA**TIPLÉN :**

1. Telok, 4. Aluru, 6. Ozüng, 8. Emk,
 9. Kin, 10. Teti, 12. Süir, 13. Jen,
 14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiocksü,
 5. Lenti, 7. Tajangzük,
 11. Teronem, 12. Sempa,
 13. Jahaz.



Tanur asoba anogo nung salem osang den noksa
 angati adokdaktsünura - Tenüng, Küm, School,
 Talidak & salem osang tejangja züller, noksa
 (photograph - any size) ka den anogo 3 mesüra 4
 jelia e-mail : tiryimyim@gmail.com nung yokang
 mesüra Tir Yimyim bureau tem nung agüjang.

*Tepela
Tasoba Anogo*



1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

Indian Army-i Gangtok nung mezüngbuba Sikkim Soldierathon ayongzük**Guwahati, October 27, 2024**

(Agencies): Indian Army nung Eastern Command aser Trishakti Corps ajanga Deobarnü Gangtok nung Sikkim Soldierathon ayonga agiogo.

Iba marathon ya "Run with our Soldiers" omen nung ajemdaker agi aser Indian Army aser India sensotem tsüngda tesentaktep akangshitsü nükjidong nung lir.

Sikkim nung lanurtemi Indian Army den tesentaktep tajung ayutstäba den fitness & sports

tourism ajungkettsü nükjidong nung iba sentong ayonga agiogo.

Soldierathon ya hill half marathon ka lir aser telemsa asem- 5 km, 10 km aser 21 km lemsar agi. Iba sentong nung states 12 kubok yimi 29 nungi nisung 1,500 temai shilem agiogo.

Takokertemi sempet balala agizük aser shilem agir shiai promotional items aser finisher's medal kaka angu.

"Nenoki mera agiba shia arstsü anükba sepaitem tushir. Fit India

ajungketba aser Indian Army o sensotem tsüngda tesentaktep

akangshiba sentong nung shilem agiba atema kanga pelar" ta Eastern Command General Officer Commanding-in-Chief (GOC-in-C) Lieutenant General Ram Chander Tiwari-i ashi.

"Soldierathon ya sentong khenyongi balaka lir aser arrtsü anükba tasütait sepaitem den külemi asemtpeptsü maongka ka angur" ta 33 Corps GOC Lieutenant General Zubin A Minwalla-ia ashi.

Assam Police-i DB stock scam nung tongti Dipankar Barman puogo**Guwahati, October 27, 2024**

(Agencies): Assam nung sen aika alangba Stock scam nung tongti süa tai tonglokja alisang Dipankar Barman Assam Police-i puogo.

Pan Bazar division nungi ACP Amit Mahato, IPS-i anir telok kati Goa nung mita aodang pa apu.

Senotsü aika tim mesüi amshiba azüoktsü atema mapa inyakba nung Barman apuba ya tongtipang lir ta züngshir.

DB Stock scam nung nisung aika ket nungi sen aika akoksadaktsüogo aser nisung aikati iba tatalokba nung tenük yoker.

Barman apuba osang tejanga

mashir saka ketdangsürtemi bushisüngdanga aruba osangtem lemsateptsü ta shiogo.

"Tatemsa Dipankar Burman Goa nung puogo. Pai jenshia senzüba tembangogo. Guwahati Police telok nem tenüngsang agütsür" ta Assam Director General of Police GP Singh-i metedaktsüogo.

Assam Rifles den khatepdang NSCN (K-YA) züngsem ka khaset**Guwahati, October 27, 2024**

(Agencies): Arunachal Pradesh kubok Longding district nung Assam Rifles den khatepdang NSCN (K-YA) züngsem ka khaset.

"Longding district kubok Changkhao area nung telungpurtem senzüba osang

tejanga angazükba sülen Assam Rifles-i search operation ka tenzüka liasü" ta Manipur, Nagaland & Southern Arunachal Pradesh

atema Defence PRO & Spokesperson Lt Col Amit Shukla-i ashi.

Iba mapang Assam Rifles-i

NSCN (K-YA) den ajurutep aser idangji pai injang khaloktsü, ta Lt Col Amit-i ashi.

Idangji sepaitemi meyiper injang khaloktsüdang NSCN (K-YA) züngsem khaset. Iba tesem nungi pistol ka aser combat materials ngutetogo, ta paisa ashi.

Pei talidak toktsür Meitei tsürtemi Ningol Chakkouba mokdanger**Imphal, October 27, 2024**

(Agencies): Manipur nung kin o kin anema rara ajanga pei talidak toktsür aotsüsa akümba Meitei tsürtemi Ningol Chakkouba festival mokdangba metedaktsüogo.

Iba sobaliba benjung ajanga kibong akümba tetsürtem aser parnok kinungbo nunger kinungertem tsüngda tesentaktep atema benjungteper aser November 3, 2024 nü amongtsü.

Sajija Jail anasa pre-fabricated houses nung jenoka aliba tetsür noklang aikati Honibarnü mener lungkak aitba sentong ka agiogo.

Parnok mapang talangka pei talidak nungi pilar lidaktsüba atema mepelaba metedaktsü aser rara anendakja parnok kidangi odakjang ta takhangba agüja lungkak ait.

"Onoki taküm Ningol Chakkouba mokdangtsü lemte togo. Kinungertem onok pelashishia jaokba atema

tenüngsang agütsür saka onok kidangi meyipa moutetba ajanga benjung amongba tetezü mali ama bilemer" ta tetsür lennir Takhellambam Ibeyaima Devi-ashi.

State sorkari onok resettlement atema temulung agütsütsüla aser sangküm nungi ang onok kidang benjung amongtsü ta lai ashi.

Manipur nung kin o kin tsüngda rara adokba ajanga kibong aika pei talidak toktsü jena aotsüa tia ka ajurua alir.

Philippines nung tzümetüsüng aser alinen agi nisung 136 takum samatsüogo

Manila, Mongputeni/Oct. 27 (Agencies): Philippines nung Tropical Storm Trami ajanga nisung asuba 100 jungogo aser tekumzüker temi awatsüng aser yimtsüngtem nung samar alirtem bushiba mapang lir.

Deobarnü tashinung Manila south tsütsü Batangas nung asuba 55 jungogo, ta provincial police chief Jacinto Malinao-i osangbener dang ashi.

Trami yipru yagi Philippines nung October 24 nü kongshi, aser taküm Southeast Asia linük nung yipru tesashi balalai agi kongshiba rongnung iba ya ka lir.

Iba yipru yagi Philippines nung kongshiba sülen nisung 36 shi samar bushir, koba ajanga nisung million tesadang ka dak tema pei ki yutsür tesem balalai jena aotsusa akum, ta national disaster agency ajanga ashir.

Philippines linük tiyonglen tesashitiba kongshiba Bicol

region nunga nisung 38 asü aser timba tzü nung araksetba lir, ta police temi ashir.

"Tang tashi onoki call aika agizüker aser onoki akokba tashi kumzüksü meranger. Joko nisung asuba malitsü imlar," ta Bicol regional police director Andre Dizon-i osangbener dang ashi.

Iba region kübok Samarnes Sur province nung alir aika tang tashi kilem mesüra parnok ki floor temaba nungi mainshiti lir, ta Dizon-i ashir.

Cavite province nunga nisung ka electrocution ajanga asü aser ka tzü nung arakseta asü ta ashir.

Danga province tem nungi nisung pongu tasümang ngutet, anungji police aser disaster agency ajanga asadangba nung ajemdaiker nisung asuba 100 lir.

"Aruya aliba anogotem ano

asür timba alitsü akok, kechiaser

tekumzüker temi tang ang

tesem kar tonga oteter," ta Civil

Defence Office nungi Edgar Posadas-i ashir.

Honibar aser Deobarnü ang tzüngsang tajungba akum, anungji tang ang samar aliba bushir aser jana-reja mürekba mapang lir.

Batangas nung aliba Taal Lake nung züngsem tenet aliba kibong ka police, coastguards aser marine diving team temi Deobarnü bushia liasü.

Batangas nung asuba ya timba alinen aluba ajanga lir.

Nisung tasümang 20 dak tema molushi, long aser süng laoa alidak nungi atsütet aser iba province nung ano nisung 20 shi samar bushitar, ta police-i ashir.

Küm shia iba linük nung yipru tesashi 20 shi agi kongshia ki o jen raksatsür aser nisung takum aika samar.

Taoba küm September ita Tropical Storm Yagi ajanga iba linük nung kongshia nisung 11 asü.

agütsüba densema lir," ta IDF-

i shisem.

Iran amakba sülen anogo ka lir Israel-i maneni Deobarnü Lebanon nung Hezbollah pur tamendakdak balala makogo.

AFP sangdong ka ajanga ashiba agi, Israel military-i Hezbollah züngsem 70 tepsetba den southern Lebanon nung taoba anogo ishika tsüngda prangbong injang yangluba aser rizünga ayuba tesem densema tesem 120 makogo.

Manger mesangwa tsüngda Beirut suburb nung tesem balala Israel nunger sepaitemi makogo.

Israeli military-i tesem balala azüngtetsü asoshi tetuyuba agütsüba sülen maka liasü.

Lebanese news agency-i linük south len Tyre aser Nabatiyah yimti amakba sangdongogo.

September 23 nü nungi rara tenzükba sülen Lebanon nung

nisung 1,615 süogo ta ketdangsürtemi osang agütsüba dak ajemdaiker AFP-i metedaktsü, ajisüaka asürtem ya timba asütsü akok ta bilemer.

Israel military-i ashiba agi, southern Lebanon nung parnok sepai pezü tepsetogo. September 30 nü nungi ali ajanga Lebanon nung Hezbollah pur amak tenzükba sülen Israel nunger sepai 36 süogo.

Tanga tatalokba ka nung Hezbollah-i ashiba agi, parnoki northern Israel nung military base ka nung rocket khalokja liasü.

Iran-i teyari agütsüba telok yagi ashiba agi, parnoki Haifa north len military industries base ka rocket aika amshia maka liasü. Honibarnü nübertem dang iba tesem azüngtetsü asoshi tetuyuba agütsüba sülen parnoki iba tesem maka liasü.

Iran indang Supreme Leader Khamenei kanga sashia shiranger

Mojtaba Khamenei-i pa melentsü amai lir. Arishi küm 85 tain Khamenei temang kangasa majung lir ta ashir aser Islamic Revolutionary Guards Corps-ia pa melentsü asoshi asadanger.

Ruhollah Khomeini asuba sülen 1989 nungi Khamenei ya Iran indang supreme leader ama inyaka arur. Taoba küm helicopter tsükokba nung Iran Tir Ebrahim Raisi asuba sülen pa melentsü asoshia tebilemtsü liasü. Raisi asuba sülen pa melentsü shimba nunga telung nung mangatettep liasü, ta The Times ajanga ashir.

Iran-i ballistic missile amshia mitkar aliba tesem nung amakba nung Israel-i telangzüba agütsüba sülen Iran lenir shirangba ajanga tensa tali tepeña kumdaiktsür. Iran ketdangsür temi tensa tamajungba mekumdaktsüner ta shia lir. Iran kisüngi masü Israel-ia Iraq aser Syria nung


tesem kar maka lir.

Iran rata-mataba ajanga par tembartem tapok tulu adoka alidang, rongsenketzung jenjang mejungi kumer ano tang supreme leader shirangba ajanga temelener agi rakteper.

Iran mitkari Honibar aonung sangdong ka nung Israel dak tayang kepzüksü ya Gaza Strip aser Lebanon nung ceasefire aliba dak keta lir ta shi. Sangdong nung Tehran-i tayang kepzüksü temeden lir saka tensa tali tamajungba makumtsü asoshi lenmang bushitsü, ta ashir.

Iran mitkari ashiba agi, Israel-i "stand-off" missiles amshia Iraqi airspace amshia amak aser Iran nung province asem amaktsü asoshi meta talangbai aotsü atema warheads tebongba amshi. Sangdong nungsa Iranian military radar amenoka aliba tesemtem raksatsü saka karbo tang yanglushiba mapang lir.

MULUNGNE O



Asür. TINUKUMZÜK LEMTUR
13-11-1945 – 21-10-2024

Onoki kanga meima aliba Obala Tinukumzük Lemtur mapang tatsüka temang manemi arudang aser October 21, 2024 nü iba akümlü toktsür pilaa aodang ozü den nübo, sarasadem, senotsü aser shisatsü agi yariteper ajak dang kangasa pelaba metedaktsür.


Tsünglanglen agüja alir dang alakteta pelaba lemsateper:

1. Molungyimsen Riongsanger Putu.
2. Molungyimsen Baptist Arogo.
3. Luyong Baptist Arogo.
4. Dimapur Molungyimsen Senso Telongjem.
5. Dimapur Molungyimsen Fellowship.
6. Sovima Ao Baptist Church.
7. Jangpetkong Kaketshir Telongjem Mungdang.
8. Sarasadem Telok Molungyimsen.
9. Tantsür Molungtet Telok Molungyimsen.
10. Asür Tinukumzük Zunga.
11. CIHRS Doctors and Nurses.

Onoki nenok ajak dang tsüngdong arua pelaba meshitetba atema sasaa bilemer, saka tulusang Tsüngremi nenok ajak molamoshia moajangma ta onoki sarasader.

-Temeim Kinungtsü, Jabasotem, Jalatem, Semchirtem aser Kinungertem.

Russia amaktsü teyari agütsüra Moscow-i telangzüba agütsütsü: Putin




Moscow, Mongputeni/ Nato linüktem, United States October 27 (Agencies): Russia tir Vladimir Putin-i Deobarnü ashiba agi, United States aser Nato-i, anüolen aliba linüktem nung yangluba long-range missile tem amshia Russia amaktsü asoshi Ukraine nem temelaba agütsüra iba atema telangzüba agütsütsü asoshi Russia indang defence ministry-i tasa balala asadar.

Ukraine nung rara tenzükba küm anaser tesadang jungogo aser iba ajanga Cold War sülen anüolen aliba linük aser Russia na tsüngda tang mangatettep tuluba adoker lir aser Russia nunger ketdangsürtemi ashiba agi, rara ya tang jenjang tamajungba kümdar.

Anüolen aliba linüktemi agütsüba missile tem amshia Russia teyongtsü amaktsü asoshi temelaba agütsüra Moscow-i iba ya parnok anema jenjang agiba ama züngshitsü, ta hopta ishika United States aser parnok den sendaktepa aliba linüktem nem metedakja arudar.

Russia amaktsü atema temelaba agütsütsü tabo United States-i yimjak nung sangdonga mali, saka US nunger ketdangsürtem kari temelaba agütsüba ajanga rara nung temelensi tulu adoktsü ta bilemer.

Ukraine nunger sepaitemi long-range drone tem amshia Russia teyongtsülen maka arudar.



Tehran, Mongputeni/Oct. 27 (Agencies): Iran indang Supreme Leader Ayatollah Ali Khamenei kanga mejungi shiranger aser pa melentsüpur raktep tenzükogo. Honibarnü Israel-i amakba asoshi Iran-i telangzüba agütsütsü asameyangba mapang iba osang ya angashir.

The New York Times ajanga osang ka sangdongba nung ashiba agi, Khamenei'er jabaso tanabuba, arishi küm 55 tain

tesem kar maka lir.

Iran rata-mataba ajanga par tembartem tapok tulu adoka alidang, rongsenketzung jenjang mejungi kumer ano tang supreme leader shirangba ajanga temelener agi rakteper.

Iran mitkari Honibar aonung sangdong ka nung Israel dak tayang kepzüksü ya Gaza Strip aser Lebanon nung ceasefire aliba dak keta lir ta shi. Sangdong nung Tehran-i tayang kepzüksü temeden lir saka tensa tali tamajungba makumtsü asoshi lenmang bushitsü, ta ashir.

Iran mitkari ashiba agi, Israel-i "stand-off" missiles amshia Iraqi airspace amshia amak aser Iran nung province asem amaktsü asoshi meta talangbai aotsü atema warheads tebongba amshi. Sangdong nungsa Iranian military radar amenoka aliba tesemtem raksatsü saka karbo tang yanglushiba mapang lir.

Azam, Shaheen na Australia den asayamung atema shimogo



Mongputeni/October 27, (November 14), Sydney 2024 (Agencies): Taoba (November 16) aser Hobart mapang captain Babar Azam (November 18) nung Twenty20 internationals asem asayatsü. November ita Australia den limited-overs asayamung atema Pakistan team nung züngoksemogo. Tena ya England den Test tatembangbuba ana atema meshimi liasü.

Ajisüaka asayar shimertemi ashiba agi, tena ya taruba ita Zimbabwe den asayatsü aliba asayamung nungbo m a s a y a d a k t s ü i anisüngzükdaktsütsü.

Deobarnü white-ball asaya captain mapa abentsü atema Azam melena Mohammad Rizwan shimba sangdongogo. Azam-i iba mapa ya iba ita tetenzüklen tokja liasü.

Pakistan aser Australia na ODI asaya asem asayatsü lir. Mezungbuba asaya Melbourne (November 4) nung asayatsü, tanabuba Adelaide (November 8) nung aser tasembuba Perth (November 10) nung asayatsü. Iba sülen ano Brisbane

Allrounders Aamer Jamal and Arafat Minhas, spinner Faisal Akram, wicketkeeper batsman Haseebullah aser batsmen Irfan Khan aser Saim Ayub nungera ODI asayamung atema tang mezüngbuba shimogo.

Azam ya 2019 küm mezüngbuba white-ball asaya captain asütsü shim, saka taoba küm India nung ODI World Cup asayaba mapang mezüngbuba round nung tsükba sülen pai iba mapa tokja liasü.

Ajisüaka pa 2024 küm March ita United States aser West Indies na nung T20I World Cup masaya tsüngda shimshi saka Pakistan-i iba asayamung nunga junga masayateti mezüngbuba round nung tsükba

sülen pai October 2 nü captain mapa tokja liasü.

Australia den asayamung atema team:

ODI team: Aamer Jamal, Abdullah Shafique, Arafat Minhas, Babar Azam, Faisal Akram, Haris Rauf, Haseebullah, Kamran Ghulam, Mohammad Hasnain, Mohammad Rizwan, Irfan Khan, Naseem Shah, Saim Ayub, Salman Agha, Shaheen Shah Afridi

T20I team: Arafat Minhas, Babar Azam, Haris Rauf, Haseebullah, Jahandad Khan, Abbas Afridi, Mohammad Rizwan, Irfan Khan, Naseem Shah, Omair Bin Yousuf, Sahibzada Farhan, Salman Agha, Shaheen Shah Afridi, Sufyan Moqim, Usman Khan

Zimbabwe den asayamung atema team:

ODI: Aamer Jamal, Abdullah Shafique, Abrar Ahmed, Ahmed Daniyal, Faisal Akram, Haris Rauf, Haseebullah, Kamran Ghulam, Mohammad Hasnain, Mohammad Rizwan, Irfan Khan, Saim Ayub, Salman Agha, Shahnawaz Dahani, Tayyab Tahir

T20I: Ahmed Daniyal, Arafat Minhas, Haris Rauf, Haseebullah, Jahandad Khan, Abbas Afridi, Mohammad Hasnain, Irfan Khan, Omair bin Yousuf, Qasim Akram, Sahibzada Farhan, Salman Agha, Sufyan Moqim, Tayyab Tahir, Usman Khan.

Herve Renard Saudi Arabia Football Coach kümogo



Herve Renard

koba social media nung post süja liasü.

"Ni Saudi Arabia den otsü ano metembangi lir aser ni meyipa aruogo," ta France nunger coach yagi shisem.

2022 World Cup nung Renard lenisüba nung Saudi team-i Argentina koka liasü, ajisüaka France tetsür team coach mapa abentsü atema pai taoba küm March ita Saudi team coach mapa tokja liasü.

Arishi küm 56 tain coach yagi Paris Olympics nung quarter-final nung Brazil team mekoki France tetsür tem tsükatokba sülen August ita mapa tokja liasü.

Italy nunger coach Mancini-i Renard melena Saudi coach mapa agizük, saka pa ita 14 sülen Brehostibarnü mapa toktsüogo. Pa lenisüba nung team-i junga masayatetba sülen pa mapa nungi anenja liasü.

2026 World Cup qualifying nung kidang Japan makokba aser Bahrain den draw asüba sülen taoba mapang Manchester City aser Inter Milan coach ya lendong nung liasü.

Japan den asaya nung tamakok anguba sülen Mancini ya mapa nungi anentsütsü akok ta jembia liasü.

National team tashi tait ka yanglutsü asoshi Saudi nükjidong lir, shinroki taoba küm asayartem dak USD billion ka dak tema intokogo aser 2034 World Cup ayongzüka asayatsü asoshi bid asürtem rongnung parnok kija lir.

Kejelcha-i world half-marathon record tasen ka yangluogo

Yomif Kejelcha



Lisbon nung otsü tasen ka yanglur aliba dang nungi second ka agi tekaraba alizing tonga otsü tasen yangluo liasü.

Kasa asayamung nung tetsürtem asemtepba Kenya tsür Agnes Ngetich-i kokogo. Lai alizing 63:04 nung tongteta la world all-time rankings nung tang tanabuba jenjang nung lir.

Kejelcha tang agi half marathon trokbuba nungang asemer liasü aser tetenzük nungi pai kanga junga asem aser kilometre asembuba atongba sülen pai tanungba asemertem toktsü takaraba asem tenzükli liasü. Pai Kenya nunger Daniel Mateiko aser Isaia Kipkoech na ajateta iba asemtepba koka liasü.

Kejelcha yagi world indoor 3000m asemtepba anaben tashi koka lir, ajisüaka taküm Paris Olympics nung 10,000m final asemtepba mapang pa trokbuba nungang tembanga liasü.

BILEMDANGANG

"Temulung pela melira takaba aser taginüba ajak amajok."

Mongputeni/October 27, 2024 (Agencies): Honibarnü Bernabeu nung El Clasico asayaba mapang fan temi Barcelona forward Lamine Yamal racially abuse astuba La Liga aser Real Madrid napronglai aitsüogo.

Social media nung video balala ajanga arishi küm 17 tain asayar yagi minute 77buba nung goal idaktsüba sülen pa tola tsülen pa tenüng nung tuyua benjungba mapa fan tem kari pa tilutsüba sayuogo.

Asaya nung Robert Lewandowski-i goal ana idaktsü aser Raphinha-ia goal ka idakja Barcelona-i iba asaya goal 4-0 agi kokogo, aser La Liga nung parnok Real dang nungi point trok agi timba kümogo.

La Liga sangdong ka ajanga,

"La Liga-i, Barcelona nunger asayar pa shilu dak ajemdaker tilutsüba ya National Police Information Brigade, Hate Crimes Section aser State Attorney General indang office, Hate Crimes & Discrimination unit Co-ordinating Prosecutor nem metedaktsütsü.

"La Liga-i Santiago Bernabeu nung iba tatalokba aitsür aser stadium tema aser telung nung racist yimya aser tesempatep raktoktsü atema bendanga agütsür lir," ta ashi.

Real Madrid-ia, Yamal tilutsürtem jangjatsü atema parnoki bushisüngdang ka tenzükogo, ta ashi.

Club sangdong ka ajang ashiba agi, "Real Madrid-i football aser saisapong nung racism, xenophobia mesüra

violence dak sendakba inyakyim ajak aitsür aser yasüng stadium nung fan tem ishikati asayar ka tilutsüba atema kanga sasa bilemer."

"Real Madrid-i aibelena alirtem jangjatsü atema bushisüngdang tenzükogo, ajita asünungdang temzüng ozüng dak ajemdaker jenjang tapet agitetsü," ta club sangdong ajangsa metedaktsü.

Spanish Football Federation (RFEF) aser La Liga nati racism anema jenjang tapet agia stadium shilem ka shibanga ayutsüba densema tanga jenjang balala agiogo.

Taoba hopta Real Madrid forward Vinicius Jr anema online campaign ka tenzükba dak sendakba nung nisung pezu puogo.

Iba campaign ajanga supporter tem dang arishi küm 24 tain Brazil nunger asayar ya racially abuse asütsü ajungshia parnok dang parnok maitsü mejangjtsü asoshi face masks tanak asemstsü shia liasü, ta police-i ashi.

2023 küm May ita Vinicius tilutsüba atema Valencia fan asem June ita tepuokdak ita ti ayutsü obendang agütsüogo.